



SAOPĆENJE ZA JAVNOST

Podmićivanje na izborima Potvrđena optužnica protiv 11 osoba

(Brčko, 15.01.2025. godine)

Tužilaštvo Brčko distrikta BiH podiglo je optužnicu protiv jedanaest osoba zbog podmićivanja na lokalnim izborima 2024.godine. Optužnicom od 23.12.2024.godine optuženi su Alija Denjagić (59)*, Admira Ramić (46)*, Suvad Tabaković (47)*, Amer Hadžić (52)*, Admir Omerčić (44)*, Samid Mujkić (55)*, Irnes Mehmedović (26)*, Hakik Nezirović (62)*, Alija Džombić (51)*, Safet Hasikić (39)* i Hasan Begić (35)* zbog osnovane sumnje u počinjenje kivičnog djela Udruživanje radi počinjenja krivičnih dijela iz člana 334 stav 1) i 2) u vezi sa krvičnim djelom Povrede slobode odlučivanja birača iz člana 192 stav 1) Krivičnog zakona Brčko distrikta BiH.

Podsjetimo, na sam dan lokalnih izbora u Bosni i Hercegovini, Tužilaštvo Brčko distrikta BiH je zahvaljujući kvalitetnim, blagovremenim i proaktivim radnjama Policije Brčko distrikta BiH započelo istragu izbornih zloupotreba u okviru koje su izvršena hapšenja i pretresi većeg broja osoba, prostorija i vozila koje su koristili. Istraga je provedena zbog osnovane sumnje da je prvooptuženi Alija Denjagić organizovao grupu ljudi, tokom septembra i oktobra 2024. godine, a ostalih 10 optuženih pridružilo se toj grupi kako bi podmićivanjem birača osigurali glasove za prvooptuženog Aliju Denjagića, odnosno sa ciljem da za sebe, na nezakonit način, osigura zastupničko mjesto u Skupštini Brčko distrikta BiH na koji način je izvršen direktni uticaj na biračku volju velikog broja birača distrikta. Tužilaštvo Brčko distrikta BiH i Policija Brčko distrikta BiH svakodnevno su otkrivali nove detalje i osobe za koje se sumnjalo da su kao saizvršioци učestvovali u izvršenju ovog krivičnog djela.

Intenzivno istražujući izborne nepravilnosti na nedavno održanim lokalnim izborima, Tužilaštvo Brčko distrikta BiH je u vrlo kratkom roku od dva mjeseca i 18 dana okončalo istragu podizanjem optužnice, koju je potvrdio Osnovni sud Brčko distrikta BiH dana 10.01.2025.godine, a kojom se prvooptuženi Alija Denjagić tereti da je organizovao grupu ljudi u cilju počinjenja krivičnog djela propisanog Krivičnim zakonom Brčko distrikta BiH za koje se može izreći kazna zatvora tri godine ili teža kazna, dok se ostalim optuženim stavlja na teret da su postali pripadnici grupe ljudi u cilju počinjenja krivičnog djela propisanog Krivičnim zakonom Brčko distrikta BiH za koje se može izreći kazna zatvora tri godine ili teža kazna.

Tužilaštvo Brčko distrikta BiH je istovremeno zatražilo da se optuženom Aliji Denjagiću izrekne mjera sigurnosti zabrane vršenja dužnosti zastupnika u Skupštini Brčko distrikta BiH Bosne i Hercegovine u trajanju od najmanje 5 (pet) godina od dana pravosnažnosti presude.

Treba napomenuti da se u konkretnom slučaju radi o predmetu organizovanog kriminala visokog nivoa u vezi sa korupcijom koja se ogleda u nezakonitom postupanju visoko pozicioniranog izabranog dužnosnika Brčko distrikta BiH koji je organizovao grupu ljudi s ciljem počinjenja krivičnog djela.

Nakon potvrđenja predmetne optužnice, postupajući Osnovni sud Brčko distrikta BiH nastaviti će postupak u ovom predmetu održavanjem ročišta za izjašnjenje o krivici optuženih.

*Ovom objavom ne prejudicira se ishod krivičnog postupka i ne narušava princip presumpcije nevinosti. Svako se smatra nevinim dok se pravosnažnom presudom ne utvrdi njegova krivica.

**ZAMJENIK GLAVNOG TUŽIOCA
VLADIMIR TEPAVČEVIĆ**